



# PERSEVERA

Un página di kurashamentu i çuia spiritual pa miembronan di Scouting Antiano



Febrüari 2014

Edishon 37 Aña 4

## Karnaval



E kustumber di karnaval a nase na **Venecia na siglo XI**, i fo'i prinsipio e tabata selebrá komo antisipashon di tempu litúrgiko di Kuaresma. E palabra "karnaval" ta bin fo'i e palabra na latin 'carnern' i 'levare', ku ta ekspresá un despedida di karni: Ayó! karni... pasobra e ta prohibí den tempu di Kuaresma. Tambe nos

por interpret'é den e sentido: Ayó! na e bida segun e deseonan di karni, pasobra tempu di kuaresma ta pidi nos dominá tur nos deseonan. Tempu di Kuaresma, ta dura 40 dia i e ta prepará nos pa selebrá morto i resurekshon di Hesus. E ta un tempu di ayuno, penitensia, sakrifisionan i rekonsiliashon ku Dios i hende.

**E apstenshon di kome karni, komo tambe tur práktikanan ku e fin di dominá nos karni a duna prinsipio na "Karnaval" i otro festividatnan i kustumbernan, ku pueblonan ta selebrá den e víspera di Kuaresma.**

Riba e dianan ku ta antisipá Kuaresma hendenan ta 'lòs' nan kurpa ku baliamentu, komementu i bebementu, konsiente ku dianan ku lo sigui, nan ta bai purba di biba den ambiente di seriedat, sakrifisio i ayuno.

Durante di karnaval hende nan ta bisti un disfras, pa no keda rekonosé pa otronan, ya ku fo'i prinsipio karnaval tabata tratá komo **dia di igualdat, den e sentido, ku e dia ei no tin ningun otoridat i pueblo por dibertí sin límite i na su propio manera.**

Fo'i prinsipio di su historia - karnaval a bira un fiesta popular di pueblonan. Den su transkurso, su partisipantenan tabata probechá pa hasi loke Iglesia ta 'prohibí' di hasi den kuaresma, pero tambe e tabata duna oportunitat na desaroyo kultural, musikal, folklórico... sosial...

Tin Iglesiasnan ta prohibí determinadamente nan miembronan pa partisipá den karnaval. Hopi biaha nos ta enfrentá e pregunta; si Iglesia katóliko ta na fabor òf kontra di karnaval?

**Karnaval, ounke e ta un fiesta di pueblo, e no ta fiesta di un pueblo kristian.**

Si nos ta trata karnaval komo e momentu pa 'lòs' nos kurpa, pasobra djis - djis ta

kuaresma, e ta un aktitut poko serio i mashá inmaduro.

Un pensamentu asina no por ta kristian pasobra, Hesus mes ta siña nos dominá nos karni/kurpa/, tur ora bai.

Deseonan di karni hopi biaha ta algu ku ta pone nos deseá kosnan ku ta kontra mandamentunan di Dios, i pa un kristian den sentro di su atenshon mester ta preokupashon pa su alma.

Kurpa mester haña respèt komo e bisti (bibá - kas) di alma.

Palabra di Dios ta bisa nos kla, ku nos kurpa ta - tèmpep di Dios i semper e mester ta den sirbishi di Dios.

**Tambe, un kristian mester ta konsiente, ku nos mester duna kuenta di tur nos pensamentunan, palabranan i obranan. Nos no por biba ni un momentu sin respetá e otoridat supremo di Dios ni esun sivil, ya ku Palabra di Dios ta confirmá ku tur otoridat ta bin di Dios.**

Esnan ku ta karga otoridat pa ku su pueblo, ni un momento por bisti un máskara. Lamentablemente tantu kasonan ta mustra nos ku esnan ku tin mando den nan man - kasi nunca ta kita nan máskara. Tapa kara i hasi kosnan sin bèrgwensa ta un akto mashá infantil i indigno di persona humano ku a keda krea na Dios su imágen i semehansa.

Fiesta di karnaval por tin su sentido den kuantu e ta un fiesta, kaminda nos ta mustra nos folklor, pa medio di nos kreativitat artístiko; músika; baile, pero ku tur responsabilidat, respèt i desensia.

Iglesia ta apoyá tur desaroyo kultural sano, komo tambe un dibershon sano.

Den kuantu durante di karnaval tin buracheria, pleitamentu, hende ku bisti indesente - sunú, provokativo, un fiesta asina Iglesia katóliko ta kondená.

**Iglesia katoliko ta prohibí òf no pa su fielnan partisipá den karnaval?**

E tarea prinsipal di Iglesia ta orientashon.

Dios a duna kada ser humano libertat pa skohe. Spiritu Santu, ku su donnan ta yuda nos pa skohe loke ta bon i rechasa loke ta malu. Nos ta trata di orientá i eduká, pero kada persona ta liber pa tuma nan desishonnan.

